

Matrix Concepts lancar Resort Villa fasa dua, nilai GDV RM135.9 juta

SEREMBAN - Pemaju perumahan, Matrix Concepts Holdings Berhad (Matrix Concepts) melancarkan kediaman jenis vila resort dengan nilai pembangunan kasar (GDV) RM135.9 juta menerusi projek terbaharunya, Resort Villa fasa dua.

Ketua Pegawai Eksekutif Kumpulan Matrix Concepts, Chai Keng Wai berkata, projek kediaman dua tingkat serba mewah dan moden di Bandar Seri Sendayan itu terdiri 34 unit vila serta dibangunkan di atas tanah seluas 6.4 hektar.

Menurutnya, projek tersebut dilaksanakan susulan kejayaan penjualan fasa pertama Resort Villa yang telah terjual sepenuhnya dalam masa tiga bulan ketika pelancarannya pada April tahun lalu.

“Untuk projek fasa dua ini yang menawarkan tiga jenis reka bentuk vila resort, ia dijangka siap sepenuhnya pada pertengahan 2026,” katanya pada Majlis Pelancaran Eksklusif Resort Villa dan Penghargaan Media di Bandar Seri Sendayan di sini pada Jumaat.

Projek Resort Villa mempunyai keluasan binaan antara 6,839 kaki persegi hingga 7,749 kaki persegi dan dilengkapi tiga jenis susun atur tersedia untuk disesuaikan dengan pilihan yang pelbagai bermula dengan harga RM3 juta.



Tetamu yang hadir pada Majlis Pelancaran Eksklusif Resort Villa dan Penghargaan Media di Bandar Seri Sendayan pada Jumaat.

Resort tersebut didatangkan dengan ciri-ciri mesra alam seperti pemanas air suria dan sistem penuaian air hujan.

Selain itu, ia turut menyediakan ciri keselamatan premium dengan sistem rumah pintar serba canggih termasuk sistem Pengecaman Plat Nombor Automatik di pintu masuk, rondaan keselamatan sepanjang masa dan sistem penggera keselamatan lengkap butang panik.

Keng Wai berkata, kediaman itu me-

nawarkan kehidupan serba kemewahan yang telah direka dengan teliti, menggabungkan keanggunan, keselesaan dan ketenangan.

“Kami bukan sekadar membina rumah tetapi kami sedang membina masa depan mampan yang mempamerkan kemewahan dan gaya hidup tiada tandingan,” katanya.

Menurut beliau, lokasinya di tengah-tengah Bandar Sri Sendayan adalah lambang keselesaan dan kehidupan mewah.

“Daripada hab pendidikan, Matrix Global Schools, rumah kelab eksklusif, d'Tempat Country Club, hiburan rekreasi luar terbesar X-Park Sendayan dan hab komersial seperti Sendayan Merchant Square.

“Perbandaran ini bersedia untuk muncul sebagai mercu tanda inovasi, memupuk pembangunan selanjutnya dan menawarkan tempat sesuai kepada semua orang,” katanya.